

四庫全書

集部

欽定四庫全書

花菴詞選卷八

宋 黃昇 撰

宋詞

魯逸仲

詞意婉麗侶万俟雅言

南浦

旅懷

風悲畫角聽單于三弄落譙門投宿駸駸征騎飛雪滿
孤村酒市漸閒燈火正敲窓亂葉舞紛紛送數聲鷺鴈

下離烟水嘹唳度寒雲
好在半隴溪月到如今無處
不銷魂故國梅花歸夢愁損綠羅裙為問暗香間艷也
相思萬點付啼痕算翠屏應是兩眉餘恨倚黃昏

水龍吟

梅花

歲窮風雪飄零望迷萬里雲垂凍紅綃碎翦凝酥繁綴
烟深霜重疎影沈波暗香和月橫斜浮動悵別來欲把
芳菲寄遠還羌管吹三弄
寂寞玉人睡起浣殘粧不
勝嬌鳳盈盈山館紛紛江路相思誰共才與風流賦稱

清艷多情唯宋算
襄王枉被梨花瘦
損又成春夢

惜餘春慢

情景

弄月餘花團風輕絮露濕池塘春草鶯鶯戀友燕燕將
雛惆悵睡殘清曉還似初相見時攜手旗亭酒香梅小
向登臨長是傷春滋味淚彈多少因甚却輕許風流
終非長久又說分飛煩惱羅衣瘦損綉被香消那更亂
紅如掃門外無窮路岐天若有情和天須老念高唐歸
夢淒涼何處水流雲遶

劉偉明

名弇號龍雲先生

洞仙歌

別恨

淒涼楚弄行客腸應斷
濤捲秋容暗
淮甸去年時正是
今日孤舟烟浪裏
身與江雲共遠
別來單枕夢幾過
滄洲皓月而今為誰滿
薄倖苦無端
誤却嬋娟有人在
玉樓天半
最不慣西風破帆來甚時節
收拾望中心眼

宋退翁

名齊愈宣和間為太學官

眼兒媚

周陵召對曰卿文章新奇可作梅詞進呈須是不經人道語齊愈立進此詞時

天語稱善次日諭近臣曰宋齊愈梅詞非惟不經人道又且自開花說至結子

黃熟并天色言之可謂盡之矣

霏霏疎影轉征鴻
人語暗香中小橋斜渡曲屏深院水
月濛濛
人間不是藏春處
玉笛曉霜空江南處處黃
垂密雨綠漲薰風

唐子西

名庚眉山入累為學官張天覺拜相擢京畿
提舉常平後坐貶惠州有詩文十卷行于世

訴衷情

旅愁

平生不會歛眉頭諸事等閒休元來却到愁處須着與
他愁殘照外大江流去悠悠風悲蘭杜烟淡滄浪何
處扁舟

何晉之

名大圭

小重山

惜別

綠樹鶯啼春正濃
釵頭青杏小
綠成叢
玉船風動酒鱗
紅歌聲咽
相見幾時重
車馬去匆匆
路隨芳草遠
恨無窮
相思只在夢魂中
今宵月偏照小樓東

陸敦信

感皇恩

旅思

殘角兩三聲
催登古道遠
水長山又重
到水聲
山色看盡輪蹄
昏曉
風頭日脚下
人空老
匹馬舊時西征談

笑綠鬢朱顏正年少旗亭斗酒任是十千傾倒而今酒
興減詩情少

趙循道

名企

感皇恩

入京

騎馬踏紅塵長安重到人面依前似花好舊歡才展又
被新愁分了未成雲雨夢巫山曉千里斷腸關山古
道回首高城似天杳滿懷離恨付與落花啼鳥故人何

處也青春老

何子初

名籀

宴清都

春詞

細草沿階軟遲日薄蕙風輕靄微暖春工靳惜桃紅尚
小柳芽猶短羅幃綉幕高捲又早是歌慵笑懶凭畫樓
那更天遠山遠水遠人遠堪歎傳粉疎狂竊香俊雅
無計拘管青絲絆馬紅巾寄羽甚時迷戀無言泪珠零

亂翠袖滴重重清徧故要知別後思量歸時覩見

向伯恭

名子諱自號薌林居士

鷓鴣天

上元有懷京師

紫禁烟花一萬重
鰲山宮闕隱晴空
玉皇端拱彤雲上
人物嬉游陸海中
星轉斗
駕回龍
五侯池館醉春風
而今白髮三千丈
愁對寒燈數點紅

阮郎歸

乙卯番陽道中

江南江北雪漫漫遙思易水寒同雲深處是三關斷腸
山又山天可老海能翻消除此恨難頻聞遣使報平

安幾時鸞輅還

報一本
作問

清平樂

詠木犀贈韓叔夏

吳頭楚尾踏破芒鞋底散入千巖秋色裏不奈惱人風
味如今老我薌林世間百不關心獨喜愛香韓壽能
來同醉花陰

韓叔夏

名璜

清平樂

同向伯恭賦木犀

秋光如水釀作鵝黃
蟻散八千岩
佳樹裏惟許修門人
醉輕鈿重上風鬟
不禁月冷霜寒
步障深沈歸去
依然愁滿江山

沈會宗

小沖山

初夏

花過園林清蔭濃
琅玕新脫笋
綠成叢
語聲只在小樓

東間欹枕敲面芰荷風
長日敞簾櫳輕塵飛不到畫
堂空一尊今夜與誰同人如玉相對月明中

菩薩蠻

初夏

落花迤邐層陰少青梅競弄枝頭小
江色雨和烟行人
江那邊
好花都過了滿地空芳草落日醉醒間一春
無此寒

驀山溪

惜別

想伊不住船在藍橋路別語未甘聽更忍問而今是去

門前楊柳幾日轉西風將行色欲留心忽忽城頭鼓
一番幽會只覺添愁緒解后却相逢又還有此時歡否
臨歧把酒莫惜十分斟尊前月月中人明夜知何處

天仙子

幽居

景物因人成勝槩滿目更無塵可礙等閒簾幕小闌干
衣未解心先快明月清風如有待誰信門前車馬隘
別是人間閒世界坐中無物不清涼山一帶水一派流
水白雲長自在

陳子高

名克天台人呂安老帥建康辟為參議有赤

城詞一卷

菩薩蠻

春

赤闌橋盡香街直
籠街細柳嬌無力
金碧上晴空
花晴
簾影紅
黃衫飛白馬
日日青樓下
醉眼不逢人
午香
吹暗塵

又 春詞

綠蕪牆遶青苔院中庭日淡芭蕉卷胡蝶上堦飛風簾
自在垂玉鈎雙語燕寶釵楊花轉幾處簸錢聲綠窓
春夢輕

又清明

池塘淡淡浮鷗鷺杏花吹盡垂楊碧天氣度清明小園
新雨晴綠窓描綉罷笑語荼蘼下圍坐賭青梅困從
雙臉來

謁金門

春曉

愁脉脉目斷江南江北烟樹重重芳信隔小樓山幾尺
細草孤雲斜日一向弄晴天色簾外落花飛不得東
風無氣力

又
春晚

花滿院飛去飛來雙燕紅雨入簾寒不卷曉屏山六扇
翠袖玉笙悽斷脉脉兩蛾愁淺消息不知郎近遠一
春長夢見

又
寒食

柳絲碧柳下人家寒食鶯語匆匆花寂寂玉堦春蘚溼
閒凭熏籠無力心事有誰知得檀炷繞窓燈背壁畫
簷殘雨滴

臨江仙

有感

四海十年兵不解征塵直到江城歲華銷盡客心驚疎
髯渾似雪哀涕欲生冰送老蘼鹽何處是我緣應在
吳興故人相望若為情別愁深夜雨孤影小窓燈

山花子

佳人

鬆慢梳頭淺畫眉
亂鶯殘夢起多時
不道小庭花露濕
翦茶蘼 簾額好風低
燕子窓油晴日打蜂兒
翠袖粉牋閒弄筆
寫新詩

浣溪沙

佳人

淺畫香膏拂紫綿
牡丹花重翠雲偏
手接梅子竝郎肩
病起心情終是怯
困來模樣不禁憐
旋移針線小姑前

又
夜景

短燭熒熒照碧窓重重簾幕護梨霜幽歡不怕夜偏長
羅襪鈿箏紅粉醉曲屏深幔綠橙香征鴻雖遠斷人
腸

鷓鴣天

憶舊

小市橋彎更向東便門長記舊相逢踏青會散秋千下
鬢影衣香怯晚風悲往事向孤鴻斷腸腸斷舊情濃
梨花院落黃茅店綉被春寒此夜同

豆葉黃

初夏

粉牆丹柱柳陰中
簾幙輕明花影重
午醉醒來一面風
綠蔥蔥幾顆櫻桃葉底紅

又新晴

樹頭初日鵲鴣鳴
野店山橋新雨晴
短褐無泥竹杖輕
水泠泠梅片飛時春草青

張敏叔

選冠子

詠柳 一名蘇武慢

漱水挹藍遙堤影翠
半雨半烟橋畔鳴禽弄
舌夢草繁

心偏稱謝家池館紅粉牆頭步搖金縷纖柔舞腰低軟
被和風搭在闌干終日畫簾高卷春易老細葉舒眉
輕花吐絮漸覺綠陰成幔章臺繫馬灞水維舟誰念鳳
城人遠惆悵故國陽關盃酒飄零惹人腸斷恨青青客
舍江頭風笛亂雲空晚

曹元寵

名組工謔詞有寵於徽宗任睿思殿待制

鷓鴣天

輦路薰風起綠槐都人凝望滿天街雲韶杳杳鳴鞘
肅芝蓋亭亭障扇開微雨過絕纖埃內家車子走晴
雷千門不敢垂簾看總上銀鈎等駕來

阮郎歸

春夢

簷頭風珮響丁東簾疎燭影紅秋千人散月溶溶樓臺
花氣中春酒醒夜寒濃蘭衾誰與同只愁夢短不相
逢覺來羅帳空

青玉案

旅情

碧山錦樹明秋霽路轉陡疑無地忽有人家臨曲水竹
籬茅舍酒旗沙岸一簇漁樵市淒涼只恐鄉心起鳳
樓遠回頭謾凝睇何處今宵孤館裏一聲征鴈半窓殘
月總是離人泪

又 旅情

田園有計歸須早在家縱貧亦好南去北來何日了光
陰送盡可憐青鬢暗逐流年老寂寥孤館殘燈照正
鄉思驚時夢初覺落月蒼蒼關河曉一聲雞唱馬嘶人

起又上長安道

如夢令

春情

門外綠陰千頃兩兩黃鸝相應睡起不勝情行到碧梧
金井人靜人靜風動一庭花影

驀山溪

梅

洗粧真態不假鉛華御竹外一枝斜想佳人天寒日暮
黃昏小院無處着清香風細細雪垂垂何況江頭路

月邊疎影夢到銷魂處結子欲黃時又須作廉纖微雨

孤芳一世供斷有情愁消瘦損東陽也試問花知否

好事近

梅花

茆舍竹籬邊雀噪晚枝時節一陣暗香飄處已不勝愁
絕江南得地故先開不待有飛雪腸斷幾回山路恨
無人攀折

憶少年

春恨

年時酒伴年時去處年時春色清明又近也却天涯為
客念過眼光陰難再得想前歡盡成陳迹登臨恨無

語把闌干暗拍

徐幹臣

名伸三衢人有青山樂府一卷行于世然多
雜調詞惟此一曲天下稱之

二郎神

春詞

悶來彈鵲又攪碎一簾花影謾試着春衫還思纖手熏
徹金猊爐冷動是愁端如何向但怪得新來多病嗟舊
日沈腰如今潘鬢怎堪臨鏡重省別時泪溼羅衣猶

凝料為我厭厭日高慵起長托春醒未醒鴈足不來馬
蹄難去門掩一庭芳景空佇立盡日闌干倚遍畫長人
靜

李玉

賀新郎

春情

篆縷銷金鼎醉沈沈庭陰轉午畫堂人靜芳草王孫知
何處惟有楊花糝徑漸玉枕騰騰春醒簾外殘紅春已
透鎮無聊殢酒厭厭病雲鬢亂未忺整江南舊事休

重省遍天涯尋消問息斷鴻難倩月滿西樓憑闌久依
舊歸期未定又只恐餅沈金井嘶騎不來銀燭暗枉教
人立盡梧桐影誰伴我對鸞鏡

李君之詞雖不多見然風流醞藉盡此篇矣

王昂

嘉王榜狀元及第

好事近

催粧詞

喜氣擁朱門光動綺羅香陌行到紫薇花下悟身非凡
客不須脂粉澆天真嫌怕太紅白留取黛眉淺處畫

章臺春色

花菴詞選卷八

欽定四庫全書

花菴詞選卷九

宋 黃昇 撰

宋詞

禪林

僧覺範

名惠洪按許彥周稱其善作小詞情思婉約
似秦少游云

鳳棲梧

梅花

碧瓦籠晴香霧繞水殿西偏小駐聞啼鳥風度女牆吹

語笑南枝破臘應開了
道骨不凡江瘴曉春色通靈
醫得花重少爆煖釀寒春杳杳江城畫角留殘照

點絳脣

流水泠泠斷橋橫路梅枝亞雪花飛下渾似江南畫
白壁青錢欲買春無價歸來也風吹平野一點香隨
馬

青玉案

上元

凝祥宴罷回歌吹畫轂走香塵起冠壓花枝馳萬騎馬

行燈開鳳樓簾卷陸海鼇山對
當年曾看天顏醉御
杯舉懽聲沸時節雖同悲樂異
海風吹夢嶺猿啼月一
枕思歸泪

僧仲殊

名揮姓張氏安州進士棄家為僧居杭州吳
山寶月寺東坡所稱蜜殊者是也有詞七卷
沈注為序

訴衷情

春情

楚江南岸小青樓樓前人艤舟別來後庭花晚花上夢
悠悠山不斷水空流謾凝眸建康宮殿燕子來時多
少閒愁

又建康

鍾山影裏看樓臺江烟晚翠開六朝舊時明月清夜滿
秦淮寂寞處兩潮迴黯愁懷汀花雨細水樹風閒又
是秋來

又寶月山作

清波門外擁輕衣楊花相送飛西湖又還春晚水樹亂
鶯啼 閒院宇小簾幃晚初歸鐘聲已過篆香才點月
到門時

又春詞

長橋春水拍堤沙疎雨帶殘霞幾聲脆管何處橋下有
人家 宮樹綠晚烟斜噪閒鴉山光無盡水風長在滿
面楊花

又寒食

湧金門外小瀛洲寒食更風流紅船滿湖歌吹花外有
高樓 晴日暖淡烟浮恣嬉遊三千粉黛十二闌干一

片雲頭

仲殊之詞多矣佳者固不少而小令為最小令之中訴衷情一調又其最蓋篇篇奇麗字字清

婉高處不減唐人風致也

蝶戀花 春愁

開到杏花寒食近人在花前宿酒和春困酒有盡時情
不盡日長只恁厭厭悶 經歲別離間與問花上啼鶯
解道深深恨可惜斷雲無定準不能為寄藍橋信

念奴嬌

荷花

水楓葉下乍湖光清淺涼生商素西帝宸遊羅翠蓋擁
出三千宮女絳綵嬌春鉛華掩晝占斷鴛鴦浦歌聲搖
曳浣沙人在何處別岸孤裊一枝廣寒宮殿冷落栖
愁苦雪艷冰肌羞淡泊偷把胭脂勻注媚臉籠霞芳心
泣露不肯為雲雨金波影裏為誰長恁凝佇

南柯子

憶舊

十里青山遠潮平路帶沙數聲啼鳥怨年華又是淒涼

時候在天涯 白露收殘月清風散曉霞綠楊堤畔鬧
荷花記得年時沽酒那人家

柳梢青

吳中

岸草平沙吳王故苑柳裊烟斜雨後寒輕風前香軟春
在梨花 行人一棹天涯酒醒處殘陽亂鴉門外秋千
牆頭紅粉深院誰家

夏雲峯

傷春

天濶雲高溪橫水遠晚日寒生輕暈閒堦靜楊花漸少

朱門掩鶯聲猶嫩悔匆匆過却清明旋占得餘芳已成
幽恨都幾日陰沈連宵慵困起來韶華都盡怨入雙
眉間鬪損乍品得情懷看承全近深深態無非自許厭
厭意終羞人問爭知道夢裏蓬萊待忘了餘香時傳音
信縱留得鶯花東風不住也則眼前愁悶

僧祖可

字正平俗蘇氏伯固之子江西詩社之一也

小冲山

春晚

誰向江頭遣恨濃
碧波流不斷
楚山重
柳烟和雨隔疎鐘
黃昏後
羅幙更朦朧
桃李小園空
阿誰猶笑語
拾殘紅
珠簾捲盡夜來風
人不見
春在綠蕪中

僧如晦

卜算子

送春

有意送春歸
無計留春住
畢竟年年用著來
何似休歸去
目斷楚天遙
不見春歸路
風急桃花也似愁
點點飛紅雨

花菴詞選卷九

欽定四庫全書

花菴詞選卷十

宋 黃昇 撰

宋詞 閨秀

吳城小龍女

清平樂令

黃魯直登荊州亭柱間有此詞魯直
悽然曰似為余發也筆勢類女子又

有泪眼不曾晴之語疑其鬼也是夕
有女子見夢曰我家豫章吳城山附
客舟至此墮水死登江亭有感而作
不意公能識之魯直驚悟曰此必吳
城小龍女也

簾卷曲闌獨倚山展暮天無際
泪眼不曾晴家在吳頭
楚尾
數點雪花亂委撲鹿沙鷗驚起
詩句欲成時没
入蒼烟叢裏

魏夫人

曾子宣丞相之內子

菩薩蠻

春景

溪山掩映斜陽裏樓臺影動
鴛鴦起隔岸兩三家出牆
紅杏花
綠楊堤下路早晚溪邊去
三見柳綿飛離人

猶未歸

又 夏

紅樓斜倚連溪曲樓前溪水凝寒玉蕩漾木蘭船船中
人少年荷花嬌欲語笑入鴛鴦浦波上暝烟低菱歌
月下歸

武陵春

別情

小院無人簾半卷獨自倚闌時寬盡春來金縷衣憔悴
有誰知玉人近日音書少應是怨來遲夢裏長安早

晚歸和泪立斜暉

好事近

恨別

雨後曉寒輕
花外曉鶯啼
歇愁聽隔溪殘漏正一聲淒
咽不堪西望去
程賒離腸萬回結
不似海棠花下按
涼州時節

減字木蘭花

春晚

落花飛絮杳杳天涯人甚處
欲寄相思春盡衡陽鴈漸稀
離腸汨眼腸斷泪痕流不斷
明月西樓一曲闌干

一倍愁

阮郎歸

別意

夕陽樓外落花飛
晴空碧四垂
去帆回首已天涯
孤烟卷翠微
樓上客鬢成絲
歸期未有期
斷魂不忍下危梯
桐陰月影移

江神子

春恨

別郎容易見郎難
幾何般懶臨鸞
憔悴容儀陡覺縷衣寬
門外紅梅將謝也
誰信道不曾看
曉粧樓上望長

安怯輕寒莫憑闌嫌怕東風吹恨上眉端為報歸期須
及早休誤妾一春閒

李易安

趙明誠之妻善為詞有漱玉集三卷

漁家傲

記夢

天接雲濤連曉霧星河欲轉千帆舞彷彿夢魂歸帝所
聞天語殷勤問我歸何處我報路長嗟日暮學詩謾
有驚人句九萬里風鵬正舉風休住蓬舟吹取三山去

一剪梅 別愁

紅藕香殘玉簟秋。輕解羅裳，獨上蘭舟。雲中誰寄錦書

來。鴈字回時，月滿

一本有西字方叶調

樓。花自飄零水自流。一

種相思，兩處閒愁。此情無計可消除。才下眉頭，却上心

頭。

如夢令 酒興

常記溪亭日暮，枕醉不知歸路。興盡晚回舟，誤入藕花
深處。爭渡，爭渡，驚起一行鷗鷺。

又苕溪漁隱云近時婦人能文詞如李易安頗多佳句如云綠肥紅瘦此語甚新

昨夜雨疎風驟濃睡不消殘酒試問卷簾人却道海棠依舊知否知否應是綠肥紅瘦

醉花陰

九日

薄霧濃雲愁永晝瑞腦銷金獸時節又重陽玉枕紗厨半夜涼初透東籬把酒黃昏後有暗香盈袖莫道不銷魂簾卷西風人似黃花瘦

念奴嬌

春情

蕭條庭院又斜風細雨重門須閉寵柳嬌花寒食近種惱人天氣險韻詩成扶頭酒醒別是閒滋味征鴻過盡萬千心事難寄樓上幾日春寒簾垂四面玉闌干慵倚被冷香銷新夢覺不許愁人不起清露晨流新桐初引多少遊春意日高烟歛更看今日晴未

前輩嘗稱易安綠肥

紅瘦為佳句余謂此篇寵柳嬌花之語亦甚奇俊前此未有能道之者

蝶戀花 離情

暖雨和風初破凍柳潤梅輕已覺春心動酒意詩情誰

與共泪融殘粉花鈿重
乍試夾衣金縷縫山枕欹斜
枕損釵頭鳳獨抱濃愁無好夢
夜闌猶剪燈花弄

鳳皇臺上憶吹簫

香冷金猊被翻紅浪起來慵自梳頭
任寶奩塵滿日上簾鉤
生怕離懷別苦多少事欲說還休
新來瘦非干病酒不是悲秋
休休這回去也千萬遍陽關也則難留
念武陵人遠烟鎖秦樓惟有樓前流水應念我終日凝眸
凝眸處從今又添一段新愁

孫夫人

名道絢號冲虛居士黃穀城之母

滴滴金

梅

月光飛入林前屋風策策度庭竹夜半江城擊柝聲動
寒梢棲宿等閒老去年華促祇有江梅伴幽獨夢繞
夷門舊家山恨驚回難續

菩薩蠻

梅

闌干六曲天圍碧松風亭下梅梢白臘盡見春回寒花

驚又開 曲瓊間不捲沈燎孤星轉凝竚小徘徊雲間
征鴈來

清平樂

雪

悠悠颺颺做盡輕模樣半夜蕭蕭窗外響多在梅邊竹
上 朱樓向曉簾開六花片片飛來無奈熏爐烟霧騰
騰扶上金釵

醉思仙

寓居妙湛悼亡作此

晚霞紅看山迷暮靄烟暗孤松動翩翩風袂輕若驚鴻

心似鑑鬢如雲弄清影月明中謾悲涼歲冉冉薜華潛
改衰容 前事銷凝久十年光景匆匆念雲軒一夢回
首春空彩鳳遠玉簫寒夜悄悄恨無窮歎黃塵久埋玉
斷腸揮泪東風

如夢令

宮詞

翠擘紅蕉影亂月上朱闌一半風自碧空來吹落歌珠
一串不見不見人被綉簾遮斷

吳淑姬

女流中點慧者有詞五卷名陽春白雪佳處
不減李易安也

小重山

春愁

謝了荼蘼春事休無多花片子綴枝頭庭槐影碎被風
揉鶯雖老聲尚帶嬌羞獨自倚粧樓一川烟草浪觀
雲浮不如歸去下簾鉤心兒小難著許多愁

惜分飛

送別

岸柳依依拖金縷是我朝來別處惟有多情絮故來衣

上留人住 兩眼啼紅空彈與未見桃花又去一片征
帆舉斷腸遙指苕溪路

祝英臺近

春恨

粉痕銷芳信斷好夢久無據病酒無聊歌枕聽春雨斷
腸曲曲屏山溫溫沈水都是舊看承人處 久離阻應
念一點芳心悶愁知幾許偷照菱花清瘦自羞覷可堪
梅子酸時楊花飛絮亂鶯啼催將春去

阮氏

阮逸之女工於文詞惟此曲傳於世

花心動

春詞

仙苑春濃小桃開枝枝已堪攀折乍雨乍晴輕暖輕寒
漸近賞花時節柳搖臺榭東風軟簾櫳靜幽禽調舌斷
魂遠閒尋翠徑頓成愁結此恨無人共說還立盡黃
昏寸心空切強整綉衾獨掩朱扉簾枕為誰鋪設夜長
更漏傳聲遠紗窓映銀缸明滅夢回處梅梢半籠淡月

盧氏

蝶戀花

驛

天聖中隨父往漢州作縣令歸題泥溪

蜀道青天烟靄翳帝里繁華迢遞何時至回望錦川揮
粉泪鳳釵斜亸烏雲膩綬帶雙垂金鏤細玉珮珠璫
露滴寒如水從此鸞粧添遠意畫眉學得遙山翠

聶勝瓊

鷓鴣天

玉慘花愁出鳳城蓮花樓下柳青青尊前一唱陽關曲
別箇人人第五程尋好夢夢難成有誰知我此時情

枕前泪共堦前雨
隔箇窻兒滴到明

陳鳳儀

成都樂妓

一落索

送蜀守蔣龍圖


蜀江春色濃如霧
擁雙旌歸去
海棠也似別君難一點
點啼紅雨
此去馬蹄何處沙堤新路
禁林賜宴賞花
時還憶著西樓否

陸氏侍兒

如夢令

送別

日暮馬嘶人去船逐清波東注後夜最高樓還肯思量
人否無緒無緒生怕黃昏疎雨



花菴詞選卷十